



INFORME SOBRE O PROXECTO DE DECRETO POLO QUE SE MODIFICA O DECRETO 77/2002, DO 28 DE FEBREIRO, POLO QUE SE APROBA O PLAN DE ORDENACIÓN DOS RECURSOS NATURAIS DA SERRA DA ENCIÑA DA LASTRA E POLO QUE SE APROBA O PLAN REITOR DE USO E XESTIÓN DO PARQUE NATURAL SERRA DA ENCIÑA DA LASTRA.

En cumprimento do disposto no artigo 43.2 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, esta Secretaría Xeral Técnica emite o seguinte,

INFORME

1. Obxecto

Constitúe o obxecto do presente decreto a modificación do Decreto 77/2002, do 28 de febreiro, polo que se aproba o Plan de Ordenación dos Recursos Naturais da Serra da Enciña da Lastra e a aprobación do Plan Reitor de Uso e Xestión do Parque Natural Serra da Enciña da Lastra.

2. Marco normativo e competencial

O artigo 149.1.23 da Constitución española atribúe competencia exclusiva ao Estado para aprobar a lexislación básica sobre protección do medio ambiente, sen prexuízo das facultades das comunidades autónomas de establecer normas adicionais de protección. Así mesmo, o seu artigo 148.1.9 dispón que as comunidades autónomas poderán asumir competencias na xestión en materia de protección do medio ambiente.

O artigo 27.30º do Estatuto de autonomía de Galicia establece a competencia para aprobar normas adicionais sobre a protección do medio ambiente e da paisaxe nos termos do artigo 149.1.23.

A Lei 42/2007, do 13 de decembro, de patrimonio natural e biodiversidade, sinala no seu artigo 31: "Os Parques son áreas naturais que, en razón á beleza das súas paisaxes, a representatividade dos seus ecosistemas ou a singularidade da súa flora, da súa fauna ou da súa diversidade xeolóxica, incluídas as súas formacións xeomorfolóxicas, posúen uns valores ecolóxicos, estéticos, educativos e científicos cuxa conservación merece unha atención preferente".

Na Comunidade Autónoma de Galicia aprobouse a Lei 9/2001, do 21 de agosto, de conservación da natureza, que ten entre os seus obxectivos a protección, restauración e mellora dos recursos naturais e a adecuada xestión dos espazos naturais e da flora e fauna silvestre. Nesta lei tamén aparece a figura de parque natural entre as categorías de espazos naturais protexidos.

Este espazo declarouse como parque natural mediante o Decreto 157/2002, do 4 de abril.

O Parque Natural Serra da Enciña da Lastra dispón dun Plan de Ordenación dos Recursos Naturais aprobado polo Decreto 77/2002, do 28 de febreiro, que recolle no seu articulado a necesidade de que o Plan Reitor de Uso e Xestión o desenvolva mediante programas básicos de actuación sectorial e que se elaborará segundo o disposto da Lei 9/2001, do 21 de agosto, de conservación da natureza e na Lei 4/1989, de conservación dos espazos naturais e da flora e fauna silvestre (norma derogada pola Lei 42/2007, do 13 de decembro).

Pola súa banda o artigo 31 da Lei 9/2001, do 21 de agosto, de conservación da natureza, enumera os distintos instrumentos de planificación dos espazos naturais protexidos e establece que nos parques a xestión levará a cabo mediante plans reitores de uso e xestión. En consecuencia e mediante esta disposición, procede aprobar o Plan Reitor de Uso e Xestión do Parque Natural Serra da Enciña da Lastra, como instrumento específico de xestión do Parque natural.



3. Estrutura do proxecto normativo

O proxecto de decreto consta tres artigos e tres disposicións derradeiras e dous anexos.

4. Tramitación

O proxecto de decreto tramítase de conformidade co disposto nos artigos 40 a 44 da Lei 16/2010, do 17 de decembro e tendo en conta o disposto na Lei 30/2014, do 3 de decembro, de parques nacionais, a Lei 9/2001, do 21 de agosto, de conservación da natureza, e a Lei 42/2007 do 13 de decembro, de patrimonio natural e da biodiversidade.

Consonte co artigo 41.1 da Lei 16/2010, do 17 de decembro, a persoa titular da entón Consellería de Medio Ambiente e Ordenación do Territorio, encargou á Dirección Xeral de Patrimonio Natural a elaboración do borrador de decreto. Consonte co artigo 41.3 da mesma lei, a aprobación inicial do anteproxecto como proxecto de orde pola persoa titular tivo lugar en data 18 de setembro de 2018.

Por medio do anuncio do 14 de marzo de 2018, foi sometido á participación do público conforme ao establecido no artigo 16 da Lei 27/2006, do 18 de xullo, pola que se regulan os dereitos de acceso á información, de participación pública e de acceso ao medio ambiente.

Conforme ao establecido no artigo 42 da Lei 16/2010, de 17 de decembro, de organización e funcionamento da Administración xeral e do sector público autonómico de Galicia, previo á aprobación do Plan Reitor de Uso e Xestión, o día 26 de setembro de 2018 publicase no Diario Oficial de Galicia núm. 184 o Anuncio de 19 de setembro de 2018, da Dirección Xeral de Patrimonio Natural polo que se acorda someter ao procedemento de información pública o proxecto de decreto polo que se aproba o Plan Reitor de Uso e Xestión do Parque Natural Serra da Enciña da Lastra.

Con posterioridade ao trámite de información pública solicitáronse os informes sectoriais preceptivos nos termos establecidos nos artigos 41 e seguintes da Lei 16/2010, de 17 de decembro, de organización e funcionamento da Administración xeral e do sector público autonómico de Galicia. Igualmente incorporáronse ao expediente os informes emitidos pola Dirección Xeral de Ordenación do Territorio e Urbanismo, polo Consello Galego de Medio Ambiente e Desenvolvemento Sostible e pola Xunta Consultiva do Parque Natural Serra da Enciña da Lastra.

Durante a tramitación pronunciáronse sobre o proxecto os seguintes órganos:

- Informe de impacto de xénero da Secretaría Xeral de Igualdade de 22 de febreiro de 2019.
- Informe da Dirección Xeral de Avaliación e Reforma Administrativa de data 15 de febreiro de 2019.
- Informe de sostibilidade financeira da Dirección Xeral de Planificación e Orzamentos de data 5 de abril de 2019.
- Informe da Dirección Xeral de Función Pública de data 25 de marzo de 2019.
- Informe da Dirección Xeral de Ordenación do Territorio e Urbanismo de 4 de xuño de 2019.



XUNTA DE GALICIA

CONSELLERÍA DE MEDIO AMBIENTE,
TERRITORIO E VIVENDA
Secretaría Xeral Técnica

San Lázaro, s/n
15781 SANTIAGO DE
COMPOSTELA



Consta no expediente a xustificación do tratamento das alegacións recibidas.

Na fase final da tramitación, o expediente remítese ao preceptivo informe da Asesoría Xurídica da Xunta de Galicia, emitíndose o informe en data 12 de xuño de 2019.

En cumprimento do disposto no artigo 43.3 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, o proxecto someterase a aprobación da persoa titular da Consellería de Medio ambiente, Territorio e Vivenda.

De conformidade co exposto, esta Secretaría Xeral Técnica informa favorablemente o proxecto de Decreto pola que se aproba o plan Reitor de Uso e Xestión do Parque Natural Serra Enciña da Lastra.

Santiago de Compostela, 27 de xuño de 2019

A secretaria xeral técnica

Carmen Bouso Montero

